

Sosiedīstē

Va ēr atejē ēlgā laukts pavasaris. Jau vēišnēs barstē žēidelius, ka suoduo apsēgīvena ēš kažēn kor atsēkraustēi Garduonā. Vēsēms ciekauninkams naujē klapatā: rēk noveizietē, par longus spuoksuotē, keravuotē.

Garduons bova tuoks gībēna ē majednos: svetor ons sēdies kāp žemē pardevēs, žuodē neēšdauš, vuo nomēi ont patiuos liob kiaurā zaunīs:

– Kor ēšejē, kap ēžīs mēiliū, a nežēnā, ka aš jiestē nuorio?

– A paveizieje, kamē tēi kriopēnas vakā kū derb?

Arba viel:

– Kū tēn čiupiniejis kāp čiupnuotē, gesink švēisa ē akšēn goltē! Kas ēš tū tava darbū?

Ka numirsi, nieks pēnkiū kapeikū neēspraus!

Garduonienē bova tuoki maktinga, straini ē pri darbū spieri. Niekor nie so kuokiuom koskeliem a kvartūgas, vēsumet viežlībā apsēdariusi. Pamatā a daržā nebova nuotrinuom apžielē, vakā bova apēpraustē ē apdarītē. Nebova barninga, bēt kumet anā dēdēle dēkte, liuob īgrīs tas vīra kamandiejēms – ka dous par tou pīpka, ta kibirkštis lieks ī vēsas posēs. Bet tuokart tas anuos gībēna liuob kažēn kāp notēls ē nolaiķīs tou sava lēižovi: galva ī petius ētraukēs pasiedies, kap mosi kondēs arba ēs goltē ont tapšana. Spakainos čiesos! Bēt, veiziek, neožēlga ē viel pradies kabinietēis, kivirčītēis. Bet pati netoriejē čiesa pruovuotēis. Tik nervus jiedē tuoki pliuotkerka, sosiedē. Pu kēimus biegiuos ē naujīnas nešiuos:

– A žēnuot, ka Garduons īr slēnkis ē pijuoks, kiaura tou alo plēmp?

– A mēslējet, ka dabā turiesem vuobulū a ougū, juk vēskū tēi Garduonāte nodraskīs.

Vēns tebie tuoks špingaliets, vuo tēi do tik negarbiems dērbtē.

– A negirdiejuot, ka tas Garduons nie bēškē nie tuoks dvasna: a tik ne ons untā sosiedams nakti nograibstē cebolēs ē burkuonus nu darža?

– A nejuot, ka Garduons naktimis eit pu sosiedu malkinīčēs ē kūrēn sava pečio? Pasakuo, ka Jazdauskis ī sava malkas étaisē pāraka, dēl tuo Garduonou pečios ē sospruoga?

Bēt laiks biega ē vēskū išaiškēna. Niekam nieks neprapuolē: ni ougas, ni cebolēs.

Pečios Garduonou spruoga, bet ne nu pāraka. Ka Jazdauskē kažēn kas paklausē aple tas malkas, tas stuoviejē, kap mēita īrējēs: nebova nieka nie girdiejēs. Ož tuokius pliuotkus rēktom krietnē par tas zeptas ožmestē. Va tēp.